

sehen/so mit dem G. verzeichnet ist/zwischen dem A E. auff die 230. auff der Regel.

Weiter/rucke die Regel A F. auff die 75. gerad vnd just auff das Pünctlein so du in das Wax hast gemacht/vnd mach sie mit der Schrauben vest.

Als dann nimb das Absehen G. so auff der Regel zwischen dem A E. auff den 230. Puncten steht/in das gesicht/vnd das orth/da du die weite begerest zu wissen/vnd rucke dz Absehen H. auff vnd ab/biß daß du beyde Absehen vnd das begerte orth/alle drey in einem gesicht der geredenach haben kanst.

Erinnerung
vnd zugewar-
ren.

Als zu einem Exempel/wenn einer zwey Absehen auff einer Büchsen/vnd das orth dahin er zieleet/in ein aug fassen muß/also muß man da zusamen fassen/die zwey Absehen (oder spizlin) auff dem Instrument/vnd das begerte orth/so findest du bey dem Absehen H. auff der Regel 860. Puncten/vnd sprichst also daß es hinauß seye 860. Schuch/dieweil du zwischen beeden ständen mit schuhen gemessen hast.

Begerst du nuhn zu wissen/wie weit von dem stand/da jetzt das Instrument steht/an das orth hinauß seye/so thue ihm also/Nimb die ledige Regel/so mit dem I. verzeichnet ist/vnd leg sie mit dem Löhlin in das Absehen G. vnd halt das ander orth zu dem Absehen H. so findest du auff der ledigen Regel 800. Puncten oder Schuch.

Das Sibende Capitel.

Wie man an ein orth soll in die weitte messen/
vnd den stand messen mit Ruten/so die
Büchsenmeister brauchen.

Szell das Instrument nach der fläche auff den Stecken/
wie du gelehrt bist in dem vorgehenden Capitel/vnd erwöhle dir noch ein andern stand/daß du bey beeden das
orth